



CONVENIO ENTRE A AXENCIA INSTITUTO ENERXÉTICO DE GALICIA (INEGA) E A CÁMARA OFICIAL MINEIRA DE GALICIA PARA O MANTEMENTO E DIFUSIÓN DO CATÁLOGO DE RECURSOS NATURAIS DISPOÑIBLES EN GALICIA 2026

MEMORIA XUSTIFICATIVA

A Xerente da Axencia Instituto Enerxético de Galicia (INEGA)

DECLARA: Que esta entidade de dereito público ten previsto formalizar con COMG, o instrumento convencional arriba referido por un período de vixencia que abrangue dende o día seguinte ao da súa sinatura e rematará o 31 de decembro de 2026.

Que o instrumento convencional ten por obxecto establecer as condicións da colaboración entre o INEGA e COMG para o mantemento e difusión do Catálogo de Recursos Naturais de Galicia.

Que o instrumento convencional que se pretende asinar se fundamenta no seguinte:

INEGA constitúese en Axencia por Decreto 142/2016, do 22 de setembro, mantendo a súa adscrición a Consellería competente en materia de enerxía, conforme ao establecido na Lei 3/1999, do 11 de marzo, e entre cuxas funcións destaca a de incidir na utilización racional da enerxía, así como diversificar as fontes enerxéticas e reducir, na medida do posible, a dependencia exterior.

Para promover a transición da Comunidade Autónoma de Galicia cara a unha economía circular seguindo as premisas impostas no ámbito comunitario e no ámbito estatal, no Consello da Xunta de Galicia celebrado o 12 de decembro de 2019 aprobouse a Estratexia Galega de Economía Circular 2020-2030, coa que a Xunta de Galicia quere impulsar un cambio na próxima década que permita substituír o noso sistema económico lineal por outro máis eficiente e racional, baseado na recuperación de materiais e que poña en valor os recursos identificados como característicos do territorio, entre os que se atopan os recursos mineiros (granito, lousa, etc.), obtidos mediante o uso de tecnoloxías máis limpas e con prácticas sustentables.

De igual xeito, o paso a unha economía descarbonizada e dixitalizada que supón o actual proceso de transición enerxética require de materias primas e procesos de produción eficientes, o que configura a minería como un sector esencial para promover as políticas enerxéticas que desenvolve o INEGA.

Na mesma liña se desenvolve a Axenda Galega de Impulso de Minería Sostible 2030 (AMSG 2030), que contempla entre as súas iniciativas actuacións encamiñadas á





mellora da sustentabilidade na minaría de Galicia, dentro das cales, as actuacións específicas obxecto do presente convenio teñen un claro encaixe.

Para a consecución dese obxectivo resulta imprescindible o compromiso activo de todos os axentes implicados, así como da sociedade en xeral, e neste sentido a COMG ven desenvolvendo nos últimos tempos un papel de vangarda actuando como aglutinadora dos diversos axentes económicos, sociais e institucionais arredor da iniciativa denominada Plataforma Minaría Sostible de Galicia, da cal é promotora.

Pola súa banda, no ámbito da integración social e territorial da actividade mineira, a COMG ten levado a cabo actuacións de gran repercusión social a través da posta en valor do patrimonio xeolóxico e mineiro.

A diferenza do convenio formalizado no ano 2023, cuxo obxecto se centraba na elaboración inicial dun catálogo de recursos minerais mediante o financiamento das actuacións necesarias para a súa creación, o presente convenio ten por finalidade establecer un marco de colaboración estable entre o INEGA e a Cámara Oficial Mineira de Galicia para o mantemento, actualización, ampliación, explotación e difusión continuada do Catálogo de Recursos Naturais de Galicia como instrumento de interese público ao servizo das políticas autonómicas de transición enerxética, economía circular e impulso da minería sustentable. As actuacións previstas non responden ao financiamento dunha actividade propia da COMG, senón á execución coordinada dun proxecto común no que ambas partes achegan medios e competencias, asumen obrigas recíprocas de colaboración, seguimento e coordinación, e comparten a titularidade e utilización dos resultados obtidos, conforme ao establecido na cláusula sexta do convenio. Por este motivo, a achega económica do INEGA constitúe a compensación dos custos derivados da execución das actuacións de interese común asumidas no marco do convenio e non unha subvención destinada ao fomento dunha actividade desenvolvida en exclusivo beneficio da entidade receptora.

O interese compartido no desenvolvemento da actividade supón, á súa vez, que as achegas que a Administración efectúa no seo do convenio non se dirixen a retribuír á outra parte, senón a posibilitar a acción conveniada.

O INEGA colaborará con COMG no financiamento do desenvolvemento do obxecto do presente Convenio, cunha achega de cen mil euros (100.000,00 €) I.V.E. engadido, con cargo a con cargo á partida orzamentaria 09.A3.561A.640.0 do seu orzamento de gastos para o ano 2026 segundo o cadro seguinte:

ACTUACIÓNS	ORZAMENTO
a) Recompilación de fichas de produtos de recursos naturais de orixe mineral dispoñibles en Galicia para ampliar o Catálogo de Recursos Naturais de Galicia incluído na Materioteca de Galicia, con novas mostras para a vinculada	





exposición que se localiza no CIS Tecnoloxía e Deseño, Ferrol.	26.000,00 €
b) Análise e avaliación de usos alternativos de produtos e subprodutos minerais galegos	19.000,00 €
c) Inclusión dos datos do Catálogo de minerais na web da Materioteca.	14.000,00 €
d) Actualizar o mapa de recursos dispoñibles do sector mineiro	20.000,00 €
e) Exposición do catálogo de Recursos Minerais da Materioteca no contexto do MMH	10.000,00 €
f) Presentación colectiva dos datos obtidos a centros tecnolóxicos, empresas e grupos de investigación do proxecto de colaboración.	11.000,00 €
TOTAL	100.000,00 €

No texto do convenio ponse de manifesto que se van realizar actividades de interese público, social e económico, co fin de acadar os obxectivos de aforro e eficiencia enerxética, xerar volume de negocio e evitar a contaminación ambiental.

En atención ao exposto, e a fin de cumprimentar o preceptuado no artigo 15.2 da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

Santiago de Compostela, na data da sinatura dixital.

A xerente,

Silvia Cortiñas Fernández

